

also vest: als dann nimb ein Senckel / vnd miß zu dem grund des
Thurns / wie vil schuch es sey / Exempel: Ich wil sehen / du habist
funden 100. schuch / so leg die Regel mit dem Absehen / mit dem
Buchstaben f. vf der Standregel by dem c. inn den puncten da
100. steht in / vnd ruck sy an das ort / so du begärst zu wissen wie
wyt es ist / so finst du vf der Regel mit dem Absehen 150. puncten.
So sprichst du / daß von dynem stand dahin syge 150. schuch
Wytter finst du vf der Regel d. 220. Puncten. So sprichst du /
daß von dem grund des Thurns dahin sey 220. schuch. Wie
du in der Figur sichst vffgerissen / vnd mit den Buchstaben K. L.
M. N. O. verzeichnet ist.

Das sibend Capitel.

Wie man die tieffe eines Brunnen messen soll.

Im das Instrument / vnd mach es an den stecken / vnd
richt die Regel mit dem buchstaben d. hin vnder werts sen-
ckelrecht / vnd ruck die Standregel mit dem buchstaben c.
gegen dem anderen ort des Brunnen / vnd mach das Instru-
ment vest. Demnach so miß von dem Instrument hinüber zu
dem anderen ort des Brunnen / wie vil schuch es sey / Exempel:
Ich wil sehen es syge 10. schuch: so nimb die Regel mit dem Ab-
sehen vnd leg sy vf die Standregel / zwüschend die buchstaben a.
b. vnd ruck sy vnder werts inn den Brunnen gegen dem anderen
ort / so finst du vf der Regel e. 30. puncten. So sprichst du / daß
der Brunnen tieff sey 30. schuch. Wie du in der Figur des vol-
genden Kupfferstück's sichst vffgerissen / vnd mit den Buchstaben

P. Q.